

倉儲

豐稔饑穰迭運。國雖富。積貯胡可廢。周禮備荒政十二。王制以三十年之通制國用。然良法美意。今時多難行之。若常平。義倉。社倉。立法經久無弊。郡縣多做焉。沃人烟稠密。多逐末取食於外。富者固有。而貧者亦不少。惴惴焉日謀饔飧之不繼。獨倉儲放收。則富恐加息。貧憂累已。異於他邑之仰給焉。歲春貸種。令鄉之長。抑之使受。計戶分食。家不及數升也。秋則家歛以收之。民運以納之。故恒以代官出陳。易新爲虐政。然賈生陳大命。晁錯稱重農。治世安民之大法在焉。縱時和歲登。家裕人足。而積貯胡可廢。志倉儲

常平倉。在縣治西。洪武三年。主簿張友直建。成化八年。知縣高隆重修。

國朝康熙三十七年。知縣潘錦重修。添建倉廩九間。康熙四十五年。另建倉廩。連前共十二座。每座三間。以盈寧大有豐亨饒裕國足民富十二字。爲廩名。康熙六十年。知縣王瑛。因歲荒。奉 文開倉。碾米煮粥。照報民數五處煮粥散賑。乾隆二年。知縣王世銑。奉 文動用常平倉穀。始給孤貧口糧。乾隆四年。知縣李卓揆。建倉廩二座。每座五間。以恒泰二字爲廩名。後奉 文捐納監生。每名捐穀一百八石。

共捐穀四千五百八十八石零。乾隆十四年。知縣鄭志鯨。奉 文常平倉定額穀一萬六千石。餘作溢穀。本年奉 文運永濟虞鄉二縣民荒散賑穀三千石。除運永虞二縣。並支給孤貧。止存穀一萬六千六百一十六石零。乾隆十七年。又奉 文動用常平倉穀八千石。運送永濟縣散賑。除運永濟。並支給孤貧軍流等口糧三百九十四石零。存貯穀七千七百八石五斗零。乾隆二十年。知縣張坊。詳請借給里民穀四千四百石。收秋後共收本息穀四千八百四十石。二十一年。又詳請出借里民穀四千石。奉 文分

徵一半二千石。本息共收穀二千二百石。二十二年。又詳請出借里民穀三十石。除二十一二年。支給孤貧口糧。所有二十一年。分徵民欠穀二千石。以及本年出借里民穀三千石。作為現在實存穀七千一百二十一石零。

社倉。在縣治西南。嘉靖三十一年。知縣陰秉暘建。一在古南門外賈祠東側。康熙七年。邑人賈漢復建。康熙四十四年。各里俱設。知縣潘錦建。雍正三年。知縣葉華暉。奉 文勸捐社穀。各村莊捐輸數十石不等。共捐穀三千六百餘石。存貯各村莊祠廟官所。後陸續捐輸。共穀六千一百二十

九石零。乾隆十三年。知縣鄭志鯨奉 文詳請將各村莊  
社倉歸併八處。一在城賈祠。一在南董靈巖院。一在庭城  
西寺。一在楊談村妙覺院。一在南上官村慈雲院。一在西  
莊關帝廟。一在白店關帝廟。一在史店關帝廟。各有社長  
經理。乾隆二十一年。知縣張坊。詳請借給里民社倉穀三  
千四百六石五斗。收秋後本息共收穀三千七百四十七  
石零。現存社倉穀。共六千四百六十九石九斗零。

義倉。乾隆十三年。知縣鄭志鯨奉 文勸捐義倉穀二千石。

存貯五所。一在城賈祠。一在東閭靈光寺。一在曲村大慈  
院。一在高縣北門內古倉。一在侯馬關帝廟。各有社長經  
理。